

每週經課朗誦經文(巴克禮漢羅/教羅)2015/08/16

共同經課 - 1

列王記上二章十節~十二節、三章三節~十四節

10 大衛 kap 伊 ê 列祖相 kap 暎，埋葬 tī 大衛 ê 城。**11** 大衛做以色列王共四十年；tī Hi-pek-lùn 做王七年，tī 耶路撒冷做王三十三年。**12** 所羅門坐伊 ê 老父大衛 ê 位；伊 ê 國堅固到極。**3** 所羅門疼耶和華，行伊 ê 老父大衛 ê 法律，獨獨 tī 山頭壇獻祭燒香。**4** 王去 Ki-piàn 獻祭，因為 tī-hia 有極大 ê 山頭壇；所羅門 tī 壇頂獻燒祭 ê cheng-siⁿ 一千隻。**5** Tī Ki-piàn，暝時 tī 夢中耶和華對所羅門出現；上帝講，你 ài 我賞賜你甚麼？thang 對我求。**6** 所羅門講，你 bat 施大恩 hō 你 ê 奴僕，我 ê 父大衛，照伊用誠實、公義、正直 ê 心，kap 你 tī-teh，行 tī 你 ê 面前；你也 kā 伊留 chit-ê 大恩典，就是賞賜伊一個 kiáⁿ 坐伊 ê 位，親像今 á 日 án-ni。**7** 耶和華我 ê 上帝 ah，taⁿ 你 hō 你 ê 奴僕續接我 ê 老父大衛做王；總是我是 gín-ná，m̄ 知 tiòh 怎樣出入。**8** 你 ê 奴僕 tiàm tī 你所揀 ê 百姓中，chiah-ê 百姓 choē 到 boē 算得，也算 boē 了。**9** 求你賞賜你 ê 奴僕智慧 ê 心，thang 判斷你 ê 百姓，來分別好 pháiⁿ；因為 chī-chūi 能判斷你 chiah-choē ê 百姓 ah？**10** 因為所羅門求這，主歡喜伊 ê 話。**11** 上帝對伊講，你既然求這，無為家己求歲壽無為家己求好額，也無求滅絕你 ê 對敵 ê 性命，單單為家己求智慧 thang 分別審判 ê 你；**12** 看 ah，我照你 ê 話來做；我賞賜你聰明智慧 ê 心；致到你以前無人親像你，你以後也無有人起來親像你。**13** 你所無求 ê，我也 hō 你；就是好額、尊貴，hō 你 tī 世間 ê 日子，列王無一個能比得你。**14** 你若行我 ê 道路，守我 ê 律例，kap 我 ê 誠命，學你 ê 老父大衛所行 ê，我就 beh hō 你長歲壽。

共同經課 - 2

詩篇一百十一篇

1 Lín tiòh o-ló 耶和華。Tī 正直人 ê 會中，kap 公會中，我 beh 專心感謝耶和華。**2** 耶和華 ê 所做真大，凡若歡喜伊所做 ê，lóng beh 查考伊。**3** 伊所行 ê 是尊貴威嚴；伊 ê 義永永 tī-teh。**4** 伊行奇事，hō 人記念；耶和華有恩惠，有憐憫。**5** 伊賞賜米糧 hō 敬畏伊 ê 人；伊 beh 永遠記念伊 ê 約。**6** 伊將伊大權能 ê 所做顯明 tī 伊 ê 百姓；將列邦 ê 業賞賜 in。**7** 伊 ê 手所做是誠實公平；伊 ê 教示 lóng 是確實。**8** 是永世代堅固 ê，是照誠實正直設立 ê。**9** 伊 òng 伊 ê 百姓施行救贖；伊定 tiòh 伊 ê 約，直到永遠；伊 ê 名是聖，thang 驚畏。**10** 敬畏耶和華是智慧 ê 根本；見若照 án-ni 行 ê，chiah 有聰明；耶和華 ê 名聲直到永遠。

共同經課 - 3

以弗所書五章十五節~二十節

15 所以 tiòh chim-chiok 看 lín ê 所行是怎樣，m̄-thang 親像無知識 ê，**16** tiòh 親像有知識 ê，tiòh 珍惜機會，因為當今 ê 時勢邪惡。**17** 所以 m̄-thang 躑躑，tiòh 明白甚麼是主 ê 旨意。**18** 也莫得酒醉，會致到放肆，是 tiòh hō 聖神充滿；**19** 用詩，用歌，用神 ê 賦，大家相應答，用心吟詩作樂來 o-ló 主；**20** 萬事常常 tī 咱 ê 主耶穌基督 ê 名，來感謝父上帝。

共同經課 - 4

約翰福音六章五十一節~五十八節

51 我是活 ê 餅，tùi 天降落 ê；人若食 chit-ê 餅，就活到永世代；koh 我所 beh hō 人 ê 餅，就是我 ê 肉為 tiòh 世間 ê 活命 chiah 賞賜 ê。**52** Tùi án-ni 猶太人相爭，講，Chit 人 thài 會用伊 ê 肉 hō 咱食？**53** 耶穌就 kā in 講，我實實 kā lín 講，Lín 若無食人子 ê 肉，無 lim 伊 ê 血，就 lín ê 內面無活。**54** 食我 ê 肉，lim 我 ê 血 ê 人有永活；末日我 beh hō 伊 koh 活。**55** 我 ê 肉是真 ê 食物，我 ê 血是真實 thang lim ê。**56** 食我 ê 肉，lim 我 ê 血 ê 人，伊 tiàm-tī 我，我亦 tiàm-tī 伊。**57** 親像活 ê 父差我，koh 我 tùi 父來活；食我 ê，beh tùi 我來活，亦是 án-ni。**58** 這就是 tùi 天降落 ê 餅；m̄ 是親像列祖 ê 食 má-ná，也死去；食 chit-ê 餅 ê 人，beh 活到永世代。